

यूहन्नाए

खाल्वाव ओसरो चिथी

आव चिथी येसुए उसिस यूहन्नाए ओसरो ज़। आव चिथील खास नेथो पाँ सरैःसिउ लिज़्या। उसंकताव पाँ आव ज़ — नैं मेंलाई मया दाद समारिज़्याव मिँ परमेस्वरए ल्योदा मनी उयुँ थू जैद ओपाँल थंरिउ लिज़्या (२ यूहन्ना ५-६)। हुकिनकाव सर्सिउ पाँ आव ज़ — साचो थंरिउ पाँत बाज़्याव मिँ परमेस्वरए ओपाँ बलेःज़्यावरास खदेप मालिद नोराए यायेनत ब मारासघैव (७-११)।

१ डा इताव सेर्द लिज़्याव लोम्बा यूहन्नाए ल्योनी नँ परमेस्वरए उमिनत छाँतिसिउ मेंमालाई नज़ारास आव चिथी परींद ड़ायाचिज़्या। डा जेलाई साचो मया डादाचिज़्या। खाली डा वाज़ माःक, परमेस्वरए साचो ओपाँत बाज़्याव भरिए प्राइँए ज़ मया दाचिज़्यार। २ परमेस्वरए ओपाँ गेयुँल बास दाद ओनैःज़्यावए जेलाई गे मया गेदाचिज़्या। आव मया एकमन्या लिन्या ले। ३ गे साचो पाँल थंरिद गे गेल मया दासिद गेचिऊसिज़्यावनी परमेस्वर गेबाबु सोनो ओज़ा येसु

ख्रीसनी नियुँ नाद, नियुँ गराँद गेयुँ ब होलाँ जैदचान्या लिनी।

नैं नैल मया दासिन्या

४ ख्वा ख्वा नज़ार परमेस्वर गेबाबुए गेलाई ओअर्थैसिउ मिताव साचो थंरिउ पाँत बाज़्यार दी लिन्या डाथैक बनै ज़ रेंद ड़ायुँ ब होलाँ ताके। ५ अ माँज़ा, नँस ड़ापाँ तोबो लिज़्या। नो पाँ नमाथैताव साःरो पाँ माःक, डादाकिन ज़ गेस लिज़्याव पाँ ज़। नो पाँ आव ज़ — नैं नैल युँ थू जैद चिऊसिन्या। ६ निताव मिँए

परमेस्वरए ल्योदा मनी उयुँ थू जैद
ओपाँल थ०रिद हो येमल बाज़्या।
झादाकिनकाव जेथैव पाँ ब हो ज़। है
जैद हो पाँत बाच्यो।

परमेस्वरए ओपाँ बले-ज़्यावरानी जोगोइसिन्या

७खाली नो पाँलाई बले-द धुत
पैज़्यावर कुधु ज़ ताद लेर। नोराए
'येसु ख्रीस मिँ मिन्सिद हुव माःक'
लिद यारासथैज़्यार। नोर ख्रीसकिन
तँदाडाव कैफतीर ज़। ८है जैद जे
जोगोइसिद लिच्यो, मानी जेदैरिज़्याव
इनाम मादैद जेपाकैधुव ब प्राइँ ज़
समैन्त्या जेले। ९जो ख्रीसए ओपाँकिन
पाखानिकाव पाँरादा बाज़्या, होस
परमेस्वर माले। जो ख्रीसए ओपाँत
धिद लिज़्या, नोस वाज़ ओबाबु

परमेस्वर ब लिज़्या, ओज़ा ख्रीस
ब लिज़्या। १०परमेस्वरए ओपाँलाई
बले-द पैज़्याव मिँए जेल्योक निताव
पाँर रैद उहुकिन जेफिमक ब तानैच्यो,
ओबाक ब घाइ ज़ तादोच्यो।
११निताव मिँलाई सघैज़्याव मिँ नोस
माचाव ओयेनत सिप ज़ ओदोज़्याव
मिताव ज़ लिज़्या।

तुपैन्त्या पाँर

१२जेलाई सदर्यान्त्या पाँर कुधु ज़
लिज़्या। खाली नो पाँर आव चिथील
मासर्द बुरू जेस गेदैसिक ज़ गेडाः
गेडाः जोरैद गोपाँया। हो बेलाक ज़
गेयुँर ब होलाँ तान्या ले।

१३आलाव छाँतिसिउ नबैनीए
ओज़ाराए याल्योनी ब जेरो है
दाचिज़्यार।